



Aqqalu C. Jerimiassen

UKA 2022/18

Atassut

11. oktober 2022

Ruslandimut Belarusimullu killilersuutaasunik suliniuteqarnissat naammassineqarnissaat pillugit Kalaallit Nunaannut inatsisissamut siunnersuutip atuutsinneqalernissaa pillugu Inatsisartut aalajangiiffigisassaattut siunnersuut

(Naalakkersuisut Siulittaasuat)

Ukioq manna februaarip 24-iani arlalippassuusimassagunarpugut pisumut alianartumut malinnaasugut, tassami Russit sakkutuui Ukrainep kangiatigut avannatigullu Belarus aqquingalugu saassussimmata.

Ila ukiuni makkunaniluunniit takorlooruminaapajaarsimangaluarpoq, Europami taamannak sorsunnermik annertutigisumik aallartittoqarsinnaanera, ajoraluartumilli taamaattoqarpoq.

Maannakkumullu killiffik suli najummatsisimanarnerusutut isikkoqarpoq, Ukrainep kujataani nunap immikkoortui 2014-imi martsip 16-iani pisimasoq assingalugu innutaasunik taasisitsinertut taallugu, nunat tiguarneqarsimasut Ruslandip ilaatut ilaalersutut avammut nalunaarutigai, kisitsisillu taasisitsinermi upperiuminaalluinnartut avammut suaarutingalugit. Qanormi ililluni innuttaasut avissaarniarlutik suli akersuuttut Kherson-imi taasineri 76,86%-iisa Ruslandimut ilanngunnissartik toqqassammassuk? Ajortoqarnera tassani erseqqarereerpoq.

Taamatulli aamma taasisitsineq suli najummatsisimanerunissamut pissutissaqalersitsivoq, piffiit pineqartut Ruslandip ilaatut Ruslandimit allattorsimatinneqalernerani, Ukrainep sakkutuui nit pulaneqarpata ajornerpaaq nallerneqartoorsinnaalerpoq. Russit pissutissaqalersinnaapput nunartik saassunneqartutut avammut suaarutigissallugu, malitsigisaanillu immikkut ittumik sakkutuuliilluni suliniarnertut isigiunnaarlugu sorsunnivittut avammut iluseqalersinneqarsinnaammat, russillu suli sakkutuuliineroqqissinnaanerannik atomillu nukinganik sakkussiarsuarnik atuilertarsinnaaneranut aqquutissaasinnaalluni. Tamannalu ila peqqunangikkaluaqaaq. Mianerisassallu tullia tassaalerportaaq eqqumaffigisariaqagaq, Soviet Unionip atuukkunnaareernerani, sakkutooqarnikkut suleqatigiinnissamik illersoqatigiinnissamillu suleqatigiiffik pilersinneqarnikoq CSTO NATO-mut assersuunneqarsinnaasoq pilersinneqarnikummat, nunanit arfinilinnit ilaasortaaffigineqartoq. Tassungalu ilaasortaasut ilaat saassunneqarpat ikiuuttussaataitaneq piulluni, najummatsisimaneq taamaammat minnerulinngivippoq.

Nunarsuup sinnerani naalagaaffiit annertuumik Russinut Belarusinullu killilersuinerat sukaruttorpoq, tassanilu uagut nunarsuarmioqataasutut peqataanissarput pissusissamisuuinnarpoq.

Killileeqataasariaqarpugut pillaaqataalluta nunanit tiguaanianut, inuiaat kiffaanngissusaannut naakkittaattunut.

Siunnersuullu taamak isikkoqartillugu, Atassummiit taperserparput.